

宋史

宋史卷四百八十七

列傳第二百四十六

外國三

高麗

高麗本曰高句驪禹別九州屬冀州之地周爲箕子之國漢之玄菟郡也在遼東蓋扶餘之別種以平壤城爲國邑漢魏以來常通職貢亦屢爲邊寇隋煬帝再舉兵唐太宗親駕伐之皆不克高宗命李勣征之遂拔其城分其地爲郡縣唐末中原多事遂自立君長後唐同光天成中其主高氏綦奉職貢長興中權知國事王建承高氏之位遣使朝貢以建爲玄菟州都督充大義軍使封高麗國王晉天福中復來朝貢開運二年建歿子武襲位漢乾祐末武歿子昭權知國事周廣順元年遣使朝貢以昭爲特進檢校太保



使持節立菟州都督大義軍使高麗國王顯德二年又遣使來貢  
加開府儀同三司檢校太尉又加太師建隆三年十月昭遣其廣  
評侍郎李興祐副使李勵希判官李彬等來朝貢四年春降制曰  
古先哲后奄宅中區曷嘗不同文軌於萬方覃聲教於四海顧予  
涼德猥被鴻名爰致賓王宐優錫命開府儀同三司檢校太師立  
菟州都督充大義軍使高麗國王昭日邊鍾粹遼左推雄習箕子  
之餘風撫朱蒙之舊俗而能占雲候海奉贄充庭言念傾輸實深  
嘉尙是用賜之懿號疇以公田載推柔遠之恩式獎拱辰之志於  
戲來朝萬里美愛戴之有孚柔撫四封庶混并之無外永係東裔  
聿承天休可加食邑七千戶仍賜推誠順化係義功臣其年九月  
遣使時贊等來貢涉海值大風船破溺歿者七十餘人贊僅免詔  
加勞恤開寶五年遣使以方物來獻制加食邑賜推誠順化守節

保義功臣進奉使內議侍郎徐熙加檢校兵部尙書副使內奉卿  
崔鄴加檢校司農卿竝兼御史大夫判官廣評侍郎康禮試少府  
少監錄事廣評員外郎劉隱加檢校尙書金部郎中皆厚禮遣之  
昭卒其子佑權領國事九年佑遣使趙遵禮奉土貢以父沒當承  
襲來聽朝旨授佑檢校太保立薨州都督大義軍使封高麗國王  
太宗卽位加檢校太傅改大義軍爲大順軍遣左司禦副率于延  
超司農寺丞徐昭文使其國佑遣國人金行成入就學於國子監  
太平興國二年遣其子元輔以良馬方物兵器來貢其年行成擢  
進士第三年又遣使貢方物兵器加佑檢校太師以太子中允直  
舍人院張洎著作郎直史館句中正爲使四年復遣供奉官閻門  
祇候王僎使其國五年六月再遣使貢方物六年又遣使來貢七  
年佑卒其弟治知國事遣使金全奉金銀線罽錦袍褥金銀飾刀

劔弓矢名馬香藥來貢且求襲位授治檢校太保立菟州都督充  
大順軍使封高麗國王以監察御史李巨源禮記博士孔維奉使  
雍熙元年遣使韓遂齡以方物來貢二年加治檢校太傅遣翰林  
侍書王著侍讀呂文仲充使三年出師北伐以其國接契丹境常  
爲所侵遣監察御史韓國華賚詔諭之曰朕誕膺丕構奄宅萬方  
華夏蠻貊罔不率俾蠢茲北裔侵敗王略幽薊之地中朝土疆晉  
漢多虞夤緣盜據今國家照臨所及書軌大同豈使齊民陷諸獷  
俗今已董齊師旅殄滅妖氛惟王久慕華風素懷明略效心純之  
節撫禮義之邦而接彼邊疆罹於蠱毒舒泄積憤其在茲乎可申  
戒師徒迭相倚角協比鄰國同力盪平奮其一鼓之雄戡此垂亾  
之寇良時不再王其圖之應俘獲生口牛羊財物器械竝給賜本  
國將士用申賞勸先是契丹伐女真國路由高麗之界女真意高



麗誘導構禍因貢馬來愬于朝且言高麗與契丹結好倚爲勢援  
剽略其民不復放還洎高麗使韓遂齡入貢太宗因出女真所上  
告急木契以示遂齡仍令歸白本國還其所俘之民治聞之憂懼  
及國華至令人言於國華曰前歲冬末女真馳木契來告稱契丹  
興兵入其封境恐當道未知空豫爲之備當道與女真雖爲鄰國  
而路途遐遠彼之情僞素知之矣貪而多詐未之信也其後又遣  
人告曰契丹兵騎已濟梅河當道猶疑不實未暇營救俄而契丹  
雲集大擊女真殺獲甚眾餘族敗散逃遁而契丹壓背追捕及于  
當道西北德昌德成威化光化之境俘禽而去時有契丹一騎至  
德米河北大呼關城戍卒而告曰我契丹之騎也女真寇我邊鄙  
率以爲常今則復仇已畢整兵回矣當道雖聞師退猶憂不測乃  
以女真避兵來奔二千餘眾資給而歸之女真又勸當道控梅河

津要築治城壘以爲防遏之備亦以爲然方令行視興功不意女  
眞潛師奄至殺略吏民驅掠丁壯沒爲奴隸轉徙它方以其歲貢  
中朝不敢發兵報怨豈期反相誣構以惑聖聽當道世稟正朔踐  
修職貢敢有二心交通外國況契丹介居遼海之外復有大梅小  
梅二河之阻女眞渤海本無定居從何徑路以通往復橫罹讒謗  
憤氣填膺日月至明諒垂昭鑒閒者女眞逃難之眾罔不存恤亦  
有授以官秩尙在當國其職位高者有勿屈尼于郝元尹能達郝  
老正衛迦邪夫等十數人欲望召赴京闕與當道入貢之使庭辯  
其事則丹石之誠庶幾昭雪國華諾之乃命發兵西會治遷延未  
卽奉詔國華屢督之得報發兵而還具錄女眞之事以奏焉十月  
遣使朝貢又遣本國學生崔罕王彬詣國子監肄業端拱元年加  
治檢校太尉以考功員外郎兼侍御史知雜呂端起居舍人呂祐

之爲使二年遣使來貢詔其使選官侍郎韓蘭卿副使兵官郎中  
魏德柔竝授金紫光祿大夫判官少府丞李光授檢校水部員外  
郎先是治遣僧如可齋表來覲請大藏經至是賜之仍賜如可紫  
衣令同歸本國淳化元年三月詔加治食邑千戶遣戶部郎中柴  
成務兵部員外郎直史館趙化成往使其國俗信陰陽鬼神之事  
頗多拘忌每朝廷使至必擇良月吉辰方具禮受詔成務在館踰  
月乃遣書於治曰王奕葉藩輔尊獎王室凡行大慶首被徽章今  
國家特馳信使以申殊寵非止歷川塗之縣邈亦復蹈溟海之艱  
危皇朝睠遇斯亦隆矣而乃牽於禁忌泥於卜數眩惑日者之浮  
說稽緩天子之命書惟典冊之垂文非卜祝之能曉是以書稱上  
日不推六甲之元辰禮載仲冬但取一陽之嘉會粲然古訓足以  
明稽所宜改圖速拜君賜儻鳳綽無滯克彰拱極之誠則龍節有



輝免貶辱命之責謹以誠告王其聽之治覽書慚懼遣人致謝焉  
會霖雨不止仍以俟霽爲請成務復遺書以責之治翌日乃出拜  
命二年遣使韓彥恭來貢彥恭表述治意求印佛經詔以藏經并  
御製祕藏銓道遙詠蓮華心輪賜之四年正月治遣使白思柔貢  
方物并謝賜經及御製二月遣祕書丞直史館陳靖祕書丞劉式  
爲使加治檢校太師仍降詔存問軍吏耆老靖等自東牟趣八角  
海口得思柔所乘海船及高麗水工卽登舟自芝岡島順風泛大  
海再宿抵甕津口登陸行百六十里抵高麗之境曰海州又百里  
至閻州又四十里至白州又四十里至其國治迎使于郊盡藩臣  
禮延畱靖等七十餘日而還遺以襲衣金帶金銀器數百兩布三  
萬餘端附表稱謝先是三年上親試諸道貢舉人詔賜高麗賓貢  
進士王彬崔罕等及第旣授以官遣還本國至是靖等使回治上

表謝曰學生王彬崔罕等入朝習業蒙恩竝賜及第授將仕郎守  
祕書省校書郎仍放歸本國竊以當道荐修貢奉多歷歲年蓋以  
上國天高遐荒海隔不獲躬趨金闕面叩玉階唯深拱極之誠莫  
展來庭之禮彬罕等幼從匏繫嗟混迹於峒夷不憚蓬飄早賓王  
於天邑緼袍裋褐玉粒桂薪堪憂食貧若爲卒歲皇帝陛下天慈  
照毓海量優容豐其館穀之資助以藝文之業去歲高懸軒鑑大  
選魯儒彬罕接武澤宮敢萌心於中鵠濫巾英域空有志於羨魚  
陛下以其萬里辭家十年觀國俾登名於桂籍仍命秩於芸臺憫  
其懷土之心慰以倚門之望別垂宸旨令歸故鄉立造曲成鴻恩  
莫報臣不勝感天戴聖之至又有張仁銓者進奉使白思柔之孔  
目吏也上書獻便安思柔意其持國陰事以告仁銓懼不敢歸上  
命靖等領以還國仍詔治釋仁銓臯治又上表謝曰官告國信使

陳靖劉式至奉傳聖旨以當道進奉使從行孔目官張仁銓至闕  
輒進便宐翻懷憂懼今附使臣帶歸本國者仁銓岨宅細民海門  
賤吏獲趨上國敢貢愚誠罔思狂瞽之尤輒奏權宐之事安塵旒  
冕上黷朝廷今者仰奉綸言釋其辜罟小人趨利豈虞僭越之求  
聖主寬恩遠降哀矜之命其張仁銓者已依詔旨放臯令掌事如  
故又上言願賜板本九經書用敦儒教許之先是式等復命治遣  
使元證衍送之證衍至安香浦口值風損船溺所齎物詔登州給  
證衍文據遣還仍賜治衣段二百匹銀器二百兩羊五十口五年  
六月遣使元郁來乞師懇以契丹寇境朝廷以北鄙甫寧不可輕  
動干戈爲國生事但賜詔慰撫厚禮其使遣還自是受制于契丹  
朝貢中絕治卒弟誦立嘗遣兵校徐遠來候朝廷德音遠久不至  
咸平三年其臣吏部侍郎趙之遴命牙將朱仁紹至登州偵之州



將以聞上特召見仁紹因自陳國人思慕皇化爲契丹羈制之狀  
乃賜誦鈿函詔一道令仁紹齎還六年誦遣使戶部郎中李宣古  
來朝謝恩且言晉割燕薊以屬契丹遂有路趣玄菟屢來攻伐求  
取不已乞王師屯境上爲之牽制詔書優荅之誦卒弟詢權知國  
事先是契丹旣襲高麗遂築六城曰興州曰鐵州曰通州曰龍州  
曰龜州曰郭州于境上契丹以爲貳己遣使來求六城詢不許遂  
舉兵奄至城下焚蕩宮室剽劫居人詢徙居昇羅州以避之兵退  
乃遣使請和契丹堅以六城爲辭自是調兵守六城大中祥符三  
年大舉來伐詢與女眞設奇邀擊殺契丹殆盡詢又于鴨綠江東  
築城與來遠城相望跨江爲橋潛兵以固新城七年方遣告奏使  
御事工部侍郎尹證古以金線織成龍鳳鞍并繡龍鳳鞍幘各二  
幅細馬二匹散馬二十四匹來貢證古還賜詢詔書七通并衣帶銀

綵鞍勒馬等八年詔登州置館於海次以待使者其年又遣御事  
民官侍郎郭元來貢元自言本國城無垣牆府曰開城管六縣民  
不下三五千有州軍百餘置十路轉運司統之每州管縣五六小  
者亦三四每縣戶三四百國境南北千五百里東西二千里軍民  
襍處隸軍者不黥面方午爲市不用錢第以布米貿易地宜杭稻  
風俗頗類中國無羊兔橐駝水牛驢氣候少寒暑差多有僧無道  
士民家器皿悉銅爲之樂有二品曰庫樂曰鄉樂三歲一試舉人  
有進士諸科算學每試百餘人登第者不過一二十每正月一日  
五月五日祭祖禰廟又正月七日家爲王母像戴之二月望僧俗  
燃燈如中國上元節上巳日以青艾染餅爲盤羞之冠端午有鞦  
韆之戲士女服尙素地產龍鬚席藤席白唾紙鼠狼尾筆元辭貌  
恭恪每受宴賜必自爲謝表粗有文采朝廷待之亦厚九年辭還

賜詢詔書七函襲衣金帶器幣鞍馬及經史曆日聖惠方等元又請錄國朝登科記及所賜御詩以歸從之天禧元年遣御事刑官侍郎徐訥奉表獻方物于崇政殿又賀封建壽春郡王三年九月登州言高麗進奉使禮賓卿崔元信至秦王水口遭風覆舟漂失貢物詔遣內臣撫之十一月元信等人見貢罽錦衣褥烏漆甲金飾長刀七首罽錦鞍馬紵布藥物等又進中布二千端求佛經一藏詔賜經還布以元信覆溺匱乏別賜衣服繒綵勇明州登州屢言高麗海船有風漂至境上者詔令存問給度海糧遣還仍爲著例五年詢遣告奏使御事禮部侍郎韓祚等一百七十九人來謝恩且言與契丹修好又表乞陰陽地理書聖惠方竝賜之金行成者素官至殿中丞治表乞放還行成自以筮仕朝廷不願歸本國又以父母垂老在海外旦暮思念恨祿不及令工圖其像置正寢



與妻史氏居茆室晨夕定省上食未嘗少懈淳化初通判安州被  
病知州李範與僚佐數人省之行成病已篤泣且言曰行成外國  
人爲朝官佐郡政病且歿未有以報主恩雖瞑目固有遺恨二子  
宗敏宗訥皆幼家素貧無它親可依旦暮委溝壑矣未幾行成歿  
其妻養二子誓不嫁織履以給範表其事詔以宗敏補太廟齋郎  
令安州月給其家錢參緡米五斛長吏歲時存問又高麗信州永  
寧人康戢字休祐父允三世爲兵部侍郎戢少好學時紇升與契  
丹交兵戢從允戰木葉山下連中二矢神色不變後陷契丹遁居  
墨斗嶺又至黃龍府開道得歸高麗時允猶在開寶中允遣戢隨  
賓貢肄業國學太平興國五年登進士第解褐大理評事知湘鄉  
縣再遷著作佐郎知江陰軍江州歷官以清白幹力聞改太常博  
士蘇易簡在翰林稱其吏才命爲廣南西路轉運副使賜緋魚就

遷正使再轉度支員外郎戶部判官出知峽越二州連被詔褒其能政又爲京西轉運使加工部郎中賜金紫戩所至好行事上章多建白以竭誠自任景德三年卒眞宗特以其子希齡爲太常寺奉禮郎給奉終喪乾興元年二月祚等辭歸國賜詢如故事會眞宗晏駕又齎遺物以賜詢天聖八年詢復遣御事民官侍郎元穎等二百九十三人奉表入見於長春殿貢金器銀罽刀劔鞍勒馬香油人參細布銅器硫黃青鼠皮等物明年二月辭歸賜予有差遣使護送至登州其後絕不通中國者四十三年詢孫徽嗣立是爲文王熙寧二年其國禮賓省移牒福建轉運使羅拯云本朝商人黃眞洪萬來稱運使奉密旨令招接通好奉國王旨意形于部述當國僻居暘谷邈戀天朝頃從祖禰以來素願梯航相繼叢爾平壤邇于大遼附之則爲睦鄰疏之則爲勍敵慮邊騷之弗息蓄

陸襲以靡遑久困羈縻難圖攜貳故違述職致有積年屢卜雲祥  
雖美聖辰於中國空知日遠如迷舊路於長安運屬垂鴻禮稽展  
慶大朝化覃無外度豁包荒山不謝乎纖埃海不辭於支派謹當  
遵尋通道遄赴橐街但茲千里之傳聞恐匪重霄之紆眷今以公  
狀附真萬西還俟得報音卽備禮朝貢徽又自言嘗夢至中華作  
詩紀其事三年拯以聞朝廷議者亦謂可結之以謀契丹神宗許  
焉命拯諭以供擬腆厚之意徽遂遣民官侍郎金悌等百十人來  
詔待之如夏國使往時高麗人往反皆自登州七年遣其臣金良  
鑑來言欲遠契丹乞改塗由明州詣闕從之郡縣供頓無舊準頗  
擾民詔立式頒下費悉官給又以其不邇華言恐規利者私與交  
關令所至禁止徽問遺二府甚厚詔以付市易務售纁帛苔之又  
表求醫藥畫塑之工以教國人詔羅拯募願行者九年復遣崔思